

el Sophi venir, son stà retenuta. Non zè segno de paxe; janizari fanno mala compagnia ai nostri franchi in Damasco, et li ha dà de le bote e vol danari. Seguita poi altre cosse particular etc.

174¹⁾ In questa matina, in Quarantia criminal fo posto, per li Avogadori di Comun, atento uno caso sequito eri, che essendo stà expedito in ditta Quarantia, per el pieder di sier Mafio Lion *olim* avogador di Comun, uno Piero Boriti e do altri soi complici; el qual Piero con testimoni falsi induseva e rechiedeva danari e altro e *tamen* nulla era con verità; hor poi fo disputà più zorni el caso e fu preso di proceder contra de lui, et preso che 'l sia bandito di Venetia e dil destreto in perpetuo con taja si 'l contrafarà, et che Luni el sia incoronato in mezo le do Colone; hor el dito, qual era in preson con segurtà di ducati 1000, udito tal condanason di esser incoronado, subito, avendo roto certi feri dil balcon qual varda soto el portego apresso l' Armamento, fuzite et scampò via. E però ozi fu preso che 'l predito si vengi a presentar per tutto Luni 26 de l'istante passado, e non ubedendo, sia bandizà di terre e lochi, navili etc., con tajon vivo lire 1000, et morto lire 500, et essendo preso, sia incoronado et stagi do anni in la preson Forte, et rimandato al bando di Venetia e dil destreto; con altre clauseole *ut in parte*, et cussi ozi fu publicata.

Da poi disnar, fo Consejo di X con la Zonta. Et prima feno la gratia al reverendo episcopo domino Marco Antonio Foscarini di Citanuova, qual per materia di monache di Mazorbo, per disobedia, vivente l'altro Doxe, fo mandato in exilio al suo episcopato, e non si parti senza licentia di questo Consejo di X, et hora è stà asolto che 'l possi venir come li piacerà. *Item*, per aricordo di Provedadori sora i danari, parlò sier Alvise da Molin procurator più vechio, fo trovato ducati . . . milia in contadi, il resto saria danari ha la Signoria fino al numero ducati 27 milia, zoè:

Fu vendudo uno caxal in Cipro, chiamato . . . , a uno ciprioto nominato pre' . . . a raxon de intrada 12 per 100, che sarà ducati 1300 contanti, e questi in vita soa e poi morto vegni in la Signoria nostra.

Fu concesso il titolo di conte di Rochas a domino Xegni Xagraticho cavalier, orator di l' università di Cipro, senza però alcuna utilità, e questo in vita soa, qual impresta a la Signoria ducati 1500 con condition in tre anni quelli ge sia restituiti, ducati 500 a l'anno a la camera di Cipro.

Fu, di volontà di tutte tre le Procuratie, preso che ducati 6000, prestono *alias* diti Procuratori, *videlicet* la Chiesa 1000, la richa 3000, l'altra 2000, et doveano esser satisfati dil deposito dil sal di questo anno dil mexe di . . . sono stà contenti la Signoria si servi di questi danari, con questo a loro Procura- 174^{*}tori sia ubligato il deposito dil 1503 di . . . Sichè la Signoria al presente si potrà servir di ditti ducati 6000. *Item*, fu preso vender il resto di le botege di Rialto a danari contadi e non più danari dil Monte nuovo, e di tal raxon sperano di trovar ducati . . . milia.

Di le poste vene letere, *videlicet dil Governador, di Verola Gisa, di 22*. Come è stato a Cremona da Lutrech, qual ha mandato 200 lanze e cavali lizieri a Parma per inanimar so fratello è dentro. *Item*, che ozi esso Governador dovea andar a unirsi con le zente, e fin do zorni zonzeria monsignor di San Valier con le zente dil dolfinà. *Item*, havia auto letere di quel Gragnis è apresso sguizari; ne veniva 4000, ma sariano più di 5000. Esso Lutrech si duol di la Signoria nostra ha fato le provision pigre, et lui Governador li ha risposto. Ha fatto bon officio. *Item*, di sier Hironimo da cha' da Pexaro provedador zeneral, in conformità *ut supra*; *etiam* sier Polo Nani pur di Varola Gisa scrive *ut supra*.

Di sier Andrea Griti procurator, provedador zeneral, di Padoa. Come questa matina partiva per andar a cena a Vizenza.

Fu preso in questo Consejo di X di vender alcuni zambeloti venuti di Cipro e di raxon dil Monte nuovo a contadi, et li danari siano per la guerra presente; li qual zambeloti sono per lo amontar di ducati 2000.

A dì 24, Sabado. Fo san Bortolomio. Fo letere di Costantinopoli dil Baylo, di 16 Lujo, il sumario dirò di soto; et di Ragusi di Giacomo di Zulian di . . . di questo, con avisi di successi di Hongaria, e come il Signor tureho havia dato do bataje a Belgrado e preso quelli 4 casteli et il loco Sabach per forza, con occision però di 1500 turchi etc.

Fu fato in Colegio alcuni capi di cavali lizieri, zoè questi: 175

Julio Scipion, cavali 50.

Mariano da Leze, cavali 50.

Scanderbeco, cavali 50.

Vicenzo e Zuan Batista de Castri da Pyran, 25.

(1) La carta 173^{*} è bianca.